

## Mokanda nwa Polo oka Baloma Maphoo ma etatele

Waaba Polo kakomele baanosi ba Loma, mena abaka o suka ya imbanga se saa iyato. Abaka na phowa ya ikyende nono o Loma, pho naino tataka koma omoo, emba ambe kula kyende ikye imola Simo Elaa o Esipanye (15.22-24). Ntina ya mokanda nwe yabaka pho ya ibongya iyaa se, na pho ya iteya mateya me oka baanosi ba Loma.

### **Mokanda mumu moli na maphoo mama:**

- Baloma 1.1-17: Mokomi nwa mokanda mumu na ntina ya etoma ye ya botoma
- Baloma 1.18-3.20: Bato babungyi nzela emba basengyesi na ibika
- Baloma 3.21-4.25: Bookobikya Nwaphongo bato
- Baloma 5.1-8.39: Bomoo bponyakune o nte ya Klisto
- Baloma 9.1-11.36: Maumunya ma Nwaphongo pho ya Isalayele
- Baloma 12.1-15.13: Mofesi nwa baanosi
- Baloma 15.14-16.27: Maloba ma isokya na ndongolo

### *Ibeya*

<sup>1</sup> Mokanda mumu moute na nga Polo, moto wa etoma wa Yesu Klisto. Nwaphongo ambanga pho ya ibaa toma ye, anzolo pho nakyende imola Simo Elaa ye oka bato, <sup>2</sup> Simo Elaa me,

Nwaphongo alolakyelaka yango o buku phe na munoko nwa baimosi bée baaphanza. <sup>3</sup> Simo Elaa me kye wo pho ya Nwana we Yesu Klisto Nkolo wa banga. Na bomoto abotama o ibota sa mokonzi Davidi. <sup>4</sup> Wa kundwa yo, Bolobo amoweninyaka Nwana wa Nwaphongo owa mwiya. <sup>5</sup> Na nzela ya Yesu, Nwaphongo na ngolu ye amba ya ntoma pho ya ngambo ya Yesu, pho na kye miimola bato ba nkyisi iso iloba se pho ba moanole bambe na motosa. <sup>6</sup> Bèe bato ba Loma oli na bèe nde bo bato me, bèe bato baabanga Nwaphongo pho o be bato ba Yesu Klisto. <sup>7</sup> Emba naekomele bèe baso, Nwaphongo kaezingye bèe bali pho ye. Nwaphongo Ango wa banga na Yesu Klisto Nkolo wa banga aephe ngolu na bese.

*Polo kazingye ikykyeka baklisto ba Loma*

<sup>8</sup> O ebandele, na nzela ya Yesu Klisto, na phe Nwaphongo wa nga melesi pho ya bèe baso, pho o munse munso, bato bawoo pho ya ianola sa be. <sup>9</sup> Nwaphongo kaebe obokye iiky wo nga ili phele, iyo okokyelele nga etoma na ndondo yonyo ná iimola Simo Elaa ekykyi Nwana we. Kaebe obokye nkolo iso wa bondele nga na bondele pho ya be. <sup>10</sup> Mbala iso o mabondesi ma nga na ongye na Nwaphongo obokye boebe mokano nwe, aingole nzela obokye nata na yaa ekyeka. <sup>11</sup> Pho nasepele na boikye iyaa ephe ikabo siuti na Bolobo Bosantu pho ya iyaekuya. <sup>12</sup> Nazingye obokye banga baso tokuyinyakye onte ya ianola sa banga oka Klisto. <sup>13</sup> Baande, eba obokye mbala nzikye naumunya iya ekyeka, kasi tewa longobane. Pho phowa ya nga eli

obokye etoma ya nga ebote mbuma oka b̄e bo wa bota yango o nkyisi iyokɔ, <sup>14</sup> Nwaphongo ampe etoma me. Yango mena nasengyesi iimola Simo Elaa oka bato basɔ, ebe bato bali o nkyisi inene, ebe bato bali o nkyisi ya mongonda. Na moeyimola oka bato baekola na oka bato bate baika ekola. <sup>15</sup> Yango mena nali na phowa ya iyaa eimola Simo Elaa na b̄e bato bali o Loma me.

### *Simo Elaa eli na mwiya*

<sup>16</sup> Sili na sɔɔ ya iimola Simo Elaa. Yango Eli mwiya njwa Nwaphongo moobikya bato basɔ baanola Yesu Klisto: Bayuda phanza, emba baate bali Bayuda sima. <sup>17</sup> Simo Elaa me kyeweninya ndengye ekye buya Nwaphongo bato, bato ba bosomebo o miyo me. Esengyesi nde obokye bato baanole nde Yesu Klisto, nzela esuu teeli. Nde bo wakomama we o buku pha Nwaphongo obokye: «Moto wa bosomebo, amobika na ianola se.»

### *Moto kakyele masumu*

<sup>18</sup> Uta o ikolo, Nwaphongo kaweninya yoo yee pho ya masumu maso na bofe bosɔ bokyele bato, maphoo mabe makyele b̄e makatele bato saeba nzela ya bosomebo. <sup>19</sup> Nwaphongo aabaphe etumbu pho nzela ekokakyi na b̄e imoeba eli polele, Nwaphongo yo mampenza abateya yango kasi b̄e te baikiyi ebanga. <sup>20</sup> Uta waakyela Nwaphongo mokyisi, bikpele biakyela yo biweninya bato polele booli yo, nabo tebiwenene na miyo. Emba te bakokyi iwo obokye teli bofe pha b̄e bo tebaamotosa.

21 Nabo okoefbe bée obokye Nwaphongo alii, tebaamokumole, tebamophe na melesi bo sen-gyesi bée ikyelela Nwaphongo. Maumunya ma bée mali nde o maphoo mpamba, bataaba o enzombi, te baefbe na lowo loolaa. 22 Bamitate obokye bali bato ba malondo, nzuka bali nde bato ba nyaa. 23 Obokye bakumbele Nwaphongo owa nkyemo, otoowe, bakumbele nde bikyeko baulana na moto ookowe, bikyeko biyoko bauluna na manyosi, biyoko na manyama, bina bikuli ba ndokolo manyama maalande na ibuu. 24 Yango mena Nwaphongo amba bale pho bakyele maphoo maabe bozinye bée ikyela, emba bambe kyela maphoo ma soo onte ya be. 25 Bale bosembo pha Nwaphongo, babengyi nde boole. Bakumbele bikpele bakyela Nwaphongo, babikyelele, kasi ona Nwaphongo owa bikyela teboamokumole, osengyesi bée ikumbela nkolo iso. Ame. 26 Yango mena Nwaphongo abale pho bakyele maphoo maso maakane bée ikyela. Babasi bale bampele babuto ikyela maphoo ma soo bée na be. 27 Bampele nde bomo me, bale babasi, bali na phowa ekusi ya ikpa bampele basu ndokolo babasi. Bampele na bampele bakyele maphoo ma soo. Bamibangyesi etumbu ekokyi pho ya masumu makyele be. 28 Pho bato bale ieba Nwaphongo, Nwaphongo abale na maumunya ma bée mabe pho bakyele maphoo mabe matemakokyi bée ikyela. 29 Mandondo ma bée matonda na maphoo maabe, bamengyele mbolo ya bato, bakyelane bofe, baokyenele zuwa, babome

bato, baokye maoka, bakatele bato, baine bato, bayo bato. <sup>30</sup> Bakyemiwole bebi na bee na bofe, bali banguna ba Nwaphongo batole bebi, bali bato ba lolendo, bamitate. Baumunya nkolo iso nde ikulaka kyela masumu, tebatosa baboti babe. <sup>31</sup> Tebakule eba lowo lolaa, tebakokya mambunu ma be, tebaebe izinga bato, tebali na ngongo na moto. <sup>32</sup> Baebe na bolaa obokye mobeko nwa Nwaphongo mowo obokye: Bato bakyele mapho mabe ndengye mena, bakokyi na iwaa. Na bokoebe bee babona, bakule kyela nde mapho maabe. Te eni ba nde yango miina, basambe wa wene bee bebi na bee bakyele mapho mabe.

## 2

### *Ndengye eya mosambisa Nwaphongo bato*

<sup>1</sup> Iwe, obe na nzaa, okosambisa bebi, etebaelimbisa. Pho waasambisa we moto, kominyete we mampenza, pho na we kokyele bomo me, iwe okosambisa bebi. <sup>2</sup> Nzuka banga toebe obokye isambisa sa Nwaphongo sikyelame na bosembo pho ya bato bakyele mapho mabe. <sup>3</sup> Koumunya obokye iwe ookosambisa bato bakyele bofe na bakyele ya be, wamolota isambisa saka Nwaphongo? <sup>4</sup> Naa iwe kotiyole bolaa pha Nwaphongo, na iyosa se, na ndondo elaa ye, saeba obokye bolaa phe boetomisa obokye obongole motema? <sup>5</sup> Na moto bokusi nwa we, na ndondo ya we ete okye na we ngongo, komifangyele kabu o mokolo nwaa kabu wamokyelama sakolo

isambisa sa Nwaphongo. <sup>6</sup> Amophe moto na moto ifonza kokokana na bitoma be: <sup>7</sup> Bomoo pha bobele pho ya bato bawaa, na ilendendala sa bee sa ikyela bolaa, baluye nkyemo, ngambo na bosembo, <sup>8</sup> kasi yoo na kabu yamoba pho ya bato baatombu, baatemele bosembo bambe na miambya o maphoo matemali na bosembo. <sup>9</sup> Ngongo na minyoko yamoba pho ya moto okokyele bofe, pho ya Moyuda phanza na pho ya moto otoli moyuda. <sup>10</sup> Nkyemo, ngambo na bose oka moto munsu okokyele bola, oka Moyuda phanza, sima oka moto ootoli moyuda <sup>11</sup> Pho oka Nwaphongo, bato basu bali nde ndengye yonyo. <sup>12</sup> Bato basu baakyela masumu saeba mobeko bamowa samibeko me. Bato basu baakyela masumu na boebakye mobeko, bamosambisama na mobeko. <sup>13</sup> Pho teli bato baakye mobeko baali bato ba bosembo o boo pha Nwaphongo, bato ba bosembo eli nde baakyelele mobeko me. <sup>14</sup> Waabe bapakano saeba mobeko, bakyele ikyitomisa mobeko, bamibuya mobeko bee mampenza, bee baate bali na mobeko. <sup>15</sup> Bateya obokye bitoma bizingye mobeko biakamama o mandondo ma be. Mandondo ma bee mawu me na maumunya ma be, bina ma baphunde bina ma baambelele. <sup>16</sup> Maphoo me mamotokolo mokolo nwaa mosambisa Nwaphongo na nzela ya Yesu Klisto, mobesi munsu nwa bato nwaa bombama, bowawu Simo Elaa ekyeimole nga.

*Bayuda na mibeko ma Mose*

<sup>17</sup> Kasi bo we ookobangye bee Moyuda, ootemi nde o mobeko na ookyesi lolendo le oka

Nwaphongo we, <sup>18</sup> koebe maphoo mazingye yo, na mobeko nwa eteya iyolo maphoo maala. <sup>19</sup> Koumunya iba moteye nwa bato baapholo miyo nzela, tala pho ya bato baali o enzombi, <sup>20</sup> moteye nwa bato bate baebe ekpele na moteye nwa bato baate bali na ngambo, pho koanole obokye nanzela ya mobeko, oli na phaakolo boebakye na ná maphoo ma phele. <sup>21</sup> Ee bolaa! Iwe okoteya nwebi, tomiteya we mampenza! Koteya obokye bato saiba, emba iwe koibe! <sup>22</sup> Kokatele bato ikyela baphemba, emba iwe kokyele baphemba! Toozingye bikyeko, kasi koibe mbolo ili o makoko ma be! <sup>23</sup> Kokyele lolendo la we o mibeko, kasi tookumole Nwaphongo waate waakumole we mina mibeko! <sup>24</sup> Pho, nde bo wakoma bee obokye: «Nkombo ya Nwaphongo etolami pho ya bee onte ya bapakano.»

<sup>25</sup> Tewali ziko, ibele sili na ntina bo kokyelele mibeko, kasi bo tokumole mibeko, na ibele sa we, oli nde moto oli mungbotu. <sup>26</sup> Kasi bo moto oli mungbotu kakumole ikiywo mibeko, bomungbotu phe ete babokye ndokolo ibele? <sup>27</sup> Emba yo otoika bele o nzoto, bo kakokya mibeko, amoesambisa; iwe ooli na buku pha mibeko na owa bele be, kasi tookumole mina mibeko. <sup>28</sup> Pho teli maphoo mawenene maakyele obokye moto ali Moyuda, naa mbasi ikiywenene o nzoto ikiykyele ibele, <sup>29</sup> kasi eli nde maphoo mabombama maakyele obokye moto ali Moyuda, emba ibele eli nde sa motema, siute na Bolobo, kasi sa buku phe. Owaakolo Moyuda mona kazwe ngambo ye oka Nwaphongo, kasi

oka bato phe.

### 3

<sup>1</sup> Ntina ya iba Moyuda eli iye? Ntina ya ibele eli iye? <sup>2</sup> Ntina eli enene pho ya bato baso! Emba phanza oka bato baaphekye Nwaphongo mambunu me. <sup>3</sup> Kasi tomowo bo? Bo bakyi babaka sakokya yasengyelaka bee ikyela, bofe pha bee phamokyela obokye Nwaphongo sakula kokya yaa lakaka yo? <sup>4</sup> Phee! Nwaphongo asengyesi iebana obokye ali moto wa maphoo maa phele; nabo moto munsu ali moto wa boole, bowakomama we obokye: «Esengyesi obokye oebane moto wa bosembo onte ya maloba ma we, emba olongye imbele saamoesambisa be.» <sup>5</sup> Kasi bo izanga bosembo sa banga siweninya bosembo pha Nwaphongo, tomowo bo? Nwaphongo kazangye bosembo waalowande yo na kabu ye? Nawo ndengye ekyeumunya bato. <sup>6</sup> Phee! Pho boeli bomu, Nwaphongo amosambisa mokyisi ndengye'ye?

<sup>7</sup> Kasi bo boole pha banga boweninya bosembo pha Nwaphongo, na pho ya nkyemo ye, pho ya'ye nga, nakule kangyema ndokolo moto wa masumu? <sup>8</sup> Emba, pho ya'ye tolokyela bofe pho bolaa boyee, bookokyeminvole bato ba boole baayoko? Bato me bakokyi na etumbu!

#### *Moto molaa o boo pha Nwaphongo tali*

<sup>9</sup> Ka bo? Tokuli ba, banga Bayuda na bokonzi mi bebi? Na nwana bokyiki phe! Pho toumbo loteya obokye: Banga baso, Bayuda na baate bali Bayuda, toli banga baso o se ya bokonzi pha



masumu. <sup>10</sup> Eli nde bo wakoma bée o buku pha Nwaphongo obokye:

«Moto molaa tali, na monomo phee,

<sup>11</sup> moto okososolo tali, na monomo taalukye Nwaphongo.

<sup>12</sup> Bato baso tebakuli benga nzela elaa, bée baso babunza,

na monomo taakyele bolaa, na monomo phee.

<sup>13</sup> Noko ya bée ili ndokolo ilita siili munoko pha, na lolee la be, bakate boole, ngyengyi ya nzoo eli o bibaa ba be.

<sup>14</sup> Noko ya bée yatonda na bitoo na ná maloba maa bololo.

<sup>15</sup> Makolo ma bée makye mizele o ikye boma moto.

<sup>16</sup> Ioto na ngongo ili o manzela maatambule be,

<sup>17</sup> emba nzela ya bose, bée tebaeyebe.

<sup>18</sup> Tebali na boilakye pha Nwaphongo o miyo ma be.»

<sup>19</sup> Kasi toebe obokye iso ikyiwo mobeko, kaiwo na bato baso baali o se ya mobeko, pho moto satakola munoko pho ya isamba, emba munse munsu moebane moe o miyo ma Nwaphongo.

<sup>20</sup> Kyeka pho ya'ye moto na monomo eta be mola o soo phe pho ya bitoma ba mobeko, pho mobeko kateya bato nde obokye bakyesi masumu.

### *Bosembo bozwame na nzela ya ianola*

<sup>21</sup> Kasi, unwanjwa eye, na nzela ya mobeko phe, bosembo pha Nwaphongo phaa miteya, mobeko na baimosi bawo pho ye. <sup>22</sup> Nwaphongo kabuya bato, bato ba bosembo o miyo me na nzela ya ianola sa bée oka Yesu Klisto.

Kakyele babona pho ya bato baso baanole, pho tewali bokyese. <sup>23</sup> Pho bato baso bakyesi masumu, emba baimasi nkyemo ya Nwaphongo. <sup>24</sup> Kasi Nwaphongo na ngolu ye, ababuya bato ba bosomebo o miyo me nde pha, kakyele babona na nzela ya Yesu Klisto oko baikole o masumu. <sup>25</sup> Nwaphongo amoambya mbeka, pho obokye awe pho ya banga, pho malongo me mamanya masumu ma banga, nzela me Nwaphongo aeyingola pho ya bato baanole Yesu Klisto. Kakyele babona pho ya iweninya obokye ali na bosomebo. Masumu maakyeleka bato phanza, Nwaphongo akyelaka ndokolo taikaka mawene, <sup>26</sup> imbele saabaka yo na motema moanda. Kateya bosomebo phe imbele sa lolu, pho abe na bosomebo, ambe na ibuya bato baanole Yesu bato ba bosomebo. <sup>27</sup> Oli wango babona, ekpele yonyo eekokyi na banga imitata eli? Phee, teli. O nkombo ya'ye? Ya bitoma? Phe, kasi o nkombo ya ianola. <sup>28</sup> Pho toebe obokye bato babutwe bato ba bosomebo o miyo ma Nwaphongo nde na ianola; kasi pho ya bitoma ba bese bo koongye mobeko phe. <sup>29</sup> Naa obokye, Nwaphongo akokyi ibaa nde Nwaphongo wa Bayuda? Tali na Nwaphongo wa bapakano? Eli bomu, ali na Nwaphongo wa bapakano, <sup>30</sup> Pho Nwaphongo ali nde yo monomo owa mobuya bato ba bosomebo bato baabele bese na baate baika bese bele pho ya ianola. <sup>31</sup> Kyelukye iwoo obokye na ianola mena tomanyanya ngambo eli na mobeko? Phe, mena tokule nde phe mobeko eyaakolo ngambo ya nwango.

## 4

*Ndakyisa ya Abalayama*

<sup>1</sup> Emba tomowɔ bo phɔ ya Abalayama nkɔkɔ wa banga? Lokola moto, azwaka iye? <sup>2</sup> Bo Abalayama abutwaka moto wa bosembo o miyo ma Nwaphongo phɔ ya bitoma be, akokyi imitata. Kasi oboo pha Nwaphongo phe! <sup>3</sup> Phɔ buku bowɔ bo? Abalayama abaka na ianola oka nwa Nwaphongo, emba bamotanga moto wa bosembo. <sup>4</sup> Nzuka phɔ ya moto okokyele bitoma, iphuti se tesitangyeme ndokolo ngolu, kasi ndokolo mbano. <sup>5</sup> Kasi phɔ ya moto otokyele bitoma kasi kaanole moto okobuya moto mobe moto wa bosembo, Nwaphongo kakyeke ianola se, kaambe mobuya moto wa bosembo. <sup>6</sup> Yango mena Davidi kakumisa boola pha moto okobuya Nwaphongo moto wa bosembo sakyeka bitoma be.

<sup>7</sup> Nkɔnzɔ eli na bato balimbise bée bofe pha bée ná masumu ma be. <sup>8</sup> Nkɔnzɔ eli na moto owa Nwaphongo taakyeke isumu se. <sup>9</sup> Bola boowɔ bée babona boli nde phɔ ya baabele na baabele, ndee na phɔ ya bate baika bée bele me? Phɔ towɔ obokye ianola sa Abalayama samobuya moto wa bosembo. <sup>10</sup> Wango wakyelama imbele iye? O boo nde o sima ya ibele se? Teli sima, kasi phanza! <sup>11</sup> Emba ibele simophe elembo ya bosembo pha zwa yo na nzela ya iamola, wataaka ba yo sa bobelekye. Yango mena abutwaka na ango wa bato basɔ batebaika bele bée baanola, phɔ ya obokye na bée babutwe bato ba bosembo. <sup>12</sup> Ali na ango wa baabele be, na

baso bali o ingomba sa bato babele nde bofesi phe, kasi na baatambule o matambe ma ianola sa ango wa banga Abalayama, oboo pha obokye bamobele.

*Mbunu ya Nwaphongo eya zwa banga na nzela ya ianola*

<sup>13</sup> Pho, teeli pho ya mobeko, kasi pho ya bosembo pha ianola, mbunu eya izwa mokyisi ndokolo ilaka sikabi be, ya lakyelamaka na Abalayama na ná bana be. <sup>14</sup> Bo baakumole mobeko babe mandomi, ianola nde tesikuli ba na ntina na mbunu ya Nwaphongo nde teekuli baa na elele. <sup>15</sup> Pho mobeko kabote yoo. Elele eteli na mobeko, tewali omoo na lowoo la itiyola mobeko. <sup>16</sup> Na ianola tobutwe mandomi, pho yango ebe obokye na ngolu na obokye mbunu eikale na ntina pho ya bankoko ba Abalayama, yango saba nde pho ya bee bamitangye baa mobeko, kasi na pho ya bamitangye ba ianola sa Abalayama, ango wa banga baso. <sup>17</sup> Pho wakomama obokye: «Naebuyee ango wa bato baikye.» Ali ango wa banga o boo pha owa anola yo, Nwaphongo ookoakole bawe na ookotokolo o mokyisi iteili. <sup>18</sup> Na ilemela sa saphembe, «aanola emba amba butwa ango wa bato baikye», bo wa wo Nwaphongo obokye: «Bankonko ba we bamoba bobo.» <sup>19</sup> Na bokyekakye nzoto ye, abaka phenephe na mambula munkama kasi taika phembe o ianola - Nabo awenekye obokye yo na nwanwasi we Sala bakotoo babutoo phenephe na iwaa. <sup>20</sup> O boo pha mbunu ya Nwaphongo, taika ika ziko, kasi azwaka bokusi na ianola

emba amba phe Nwaphongo nkyemo. <sup>21</sup> Abaka na ianola obokye Nwaphongo ali na mwiya nwa ikokya yaalakyela yo. <sup>22</sup> Yango mena Nwaphongo atanga Abalayama o molongo nwa bato ba bosembo, pho ya ianola se. <sup>23</sup> Nzuka tewaikaka komama babona pho ye mampenza obokye: «Yango mena bamotanga o molongo nwa bato ba bosembo». <sup>24</sup> Kasi na pho ya banga me baanola, pho toanole oka moto owa kundwa onte ya bawe, Nkolo Yesu. <sup>25</sup> Bamokaba o iwa pho ya bofe pha banga, amba kundwa pho ya ilobuya na banga bato ba bosembo.

## 5

### *Bose boli onte ya banga na Nwaphongo*

<sup>1</sup> Yango mena, toli bato ba bosembo pho ya ianola sa banga, toli bose na Nwaphongo pho ya Nkolo wa banga Yesu Klisto. <sup>2</sup> Na nzela ye, na ianola, baloanosi izwa ngolu ya Nwaphongo ekyekele obokye tomitate na molemo nwa nkyemo ya Nwaphongo. <sup>3</sup> Na koleka, tomitate na o mampasi, pho toebe obokye mpasi kabote ilendendala, <sup>4</sup> ilendendala kabote iititala simekyi be, iititala simekyi bee sibote molemo. <sup>5</sup> Emba molemo taakate, pho Bolobo Bosantu phaalophekye be, anyangola lozingo la Nwaphongo o mandondo ma banga. <sup>6</sup> Phele, wataka ba banga naino sa bokusi, Klisto, o imbele sameka be, awa pho ya bato babe. <sup>7</sup> Eli nkamba obokye baanole iwa pho ya moto molaa. Moto akoyi ikoka izwa bokusi pha iwa pho ya moto molaa. <sup>8</sup> Kasi Nwaphongo kateya lozingo

le oka banga na bobo: Klisto awa pho ya banga, mena totaba naino bato ba masumu. <sup>9</sup> Emba oobuto banga unwanwa eye bato ba bosembo pho ya malongo me, tomobika ne o kabu ya Nwaphongo. <sup>10</sup> Pho bo ebe obokye wataka ba banga banguna ba Nwaphongo, tobongyeyeye ne na iwa sa Nwana we, ka ombi bongya banga, tomobika na bomoo phe. <sup>11</sup> Teli nde babona, waakule mitata banga oka Nwaphongo na nzela ya Nkolo wa banga Yesu Klisto, na nzela ya ye, unwanwa eye, tozwe mabongye.

### *Adama na Klisto*

<sup>12</sup> Isumu sanyolo o mokyisi na nzela ya moto monomoo, Adama, emba iwa na nzela ya isumu. Nde bomoo iwa siesi pho ya bato baso, pho bato baso bakyela isumu. <sup>13</sup> Pho, nono o mobeko, isumu sabaka o mokyisi emba na bo isumu tesaikaka zwa etumbu wa tewabaka mobeko. <sup>14</sup> Kasi uta oka Adama nono oka Mose iwa sabaka, na oka batebaikaka kyela isumu na itiyola mobeko ndengye yonoyo na Adama owa ulana na owa moya.

<sup>15</sup> Kasi tewali bomoo pho ya ikabo sa ngolu pho ya bobo. Pho, bo pho ya bobo pha moto monomoo bato baikye bawe, ka pho ya ngolu ya Nwaphongo, ngolu eelokyelesi yo na moto monomoo, Yesu klisto, enyango na boikye mi bato boikye. <sup>16</sup> Emba teli bomoo me pho ya ikabo bo pho isumu sa moto monomoo. Pho, pho ya isumu sa moto monomoo isamba sikambe o etumbu, kasi bobo boikye, ikabo sa ngolu sikambe o bosembo. <sup>17</sup> Pho bo pho ya moto monomoo, na nzela ya bobo pha moto monomoo iwa siesi, ka pho ya

moto mɔnɔmɔ Yesu Klisto, bato baikye baamoba na bomɔ bamozwa ngɔlu na boikye na ikabo sa bosembo. <sup>18</sup> Yango mena, ooli phɔ ya bofe pha moto mɔnɔmɔ bato basɔ bazwe etumbu, nde bomɔ mɛ phɔ ya etoma ya bosembo ya moto mɔnɔmɔ, eli phɔ ya bato basɔ bosembo boo ambya bomɔ. <sup>19</sup> Nde phɔ ya obokye na izanga botosi pha moto mɔnɔmɔ, bato baikye babutwakyi bato bamasumu, nde bomɔ mɛ na itosa sa moto mɔnɔmɔ bato babuto bato ba bosembo o miyo ma Nwaphongo. <sup>20</sup> Mobeke moesi phɔ ya obokye bofe botonde. Elele eli masumu maikye, ngɔlu na yango etondi wamɔ. <sup>21</sup> Phɔ ya obokye bo oesi isumu phɔ ya iwa, nde bomɔ phɔ ya bosembo, ngɔlu eesi phɔ ya bomɔɔ pha bofele na nzela Yesu Klisto, Nkolo wa banga.

## 6

### *Iwa na bomɔɔ oka Yesu Klisto*

<sup>1</sup> Tomba wɔ bo? Toikale nde oikyela maasumu, phɔ ngɔlu ya Nwaphongo etonde? <sup>2</sup> Tekokyi iba bomɔ. Na isumu toli bawe, tomba kula bika na isumu ndengye'ye? <sup>3</sup> Na bɛɛ kobungye obokye banga basɔ baabatisama na nkombo ya Yesu, tobatisama na iwa sɛ? <sup>4</sup> Na batisimo, na iwa sɛ, tokundamaka nɛ, phɔ ya obokye bo wakundwa Klisto onte ya bawe na nkyɛmɔ ya Tata, na banga mɛ nde bomɔ tobikye na bomɔɔ pha sika. <sup>5</sup> Phɔ bo tobuto nɛ moto mɔnɔmɔ, toulaa nɛ o iwa sɛ, tomba kula ulana nɛ mɛ o ikundwa sɛ. <sup>6</sup> Toebe na bolaa: Mobeke nwa banga mookasi nwa bakama nɛ o ekulusu phɔ ya obokye nzoto ya masumu imane phɔ banga sakula ba baombo ba masumu.

<sup>7</sup> Pho moto oowe aikolami na masumu. <sup>8</sup> Bo towe molongo na Klisto, toli na ianola obokye tomobika ne. <sup>9</sup> Pho toebe obokye: Waakundwa yo onte ya bawe, Klisto etakule waa. Iwaa tesikuli ba na bokonzi o ikolo se. <sup>10</sup> Pho na iwaa, awe pho ya isumu mbala yonyo pho ya bobele. Kasi na bomoo, ali na bomoo pho ya Nwaphongo. <sup>11</sup> Yango mena na bée, omikpe obokye na isumu, oli bawee emba na Yesu Klisto, oli na bomoo pho ya Nwaphongo.

<sup>12</sup> Eli obokye isumu tesikuli ba na bokonzi mi nzoto ya bée ikyi we pho ya ietomisa ianola maphowa mabe me. <sup>13</sup> Sakyelela binango ba nzoto ya bée pho ya masumu ndokolo binwanele ba maphoo mate mali na bosembo, kasi ndokolo bato baakundwa onte ya bawe, na binango ba nzoto ya bée, ndokolo binwanele ba bosembo, omiambya o etoma ya Nwaphongo. <sup>14</sup> Pho isumu etesikule ba na bokonzi o ikolo sa bée, pho bée tokuli ba o se ya mibeko, kasi o se ya ngolu.

### *Tokyelele bosembo*

<sup>15</sup> Emba kyelukfye iwoo bo? Tomokyela masumu pho tolokuli ba o se ya mibeko, kasi o se ya ngolu? Teli bomoo! <sup>16</sup> Toebe obokye wamiambya bée oka moto ndokolo moombo pho ya imokumola, oli baombo ba ookokumle bée, naa ba isumu sikambe o iwa, naa ba itosa sikambe o bosembo. <sup>17</sup> Kasi Nwaphongo akumisame obokye, na bo phanza bée wabaka baombo ba masumu, kasi unwanwa eye obuto itosa na motema monomo lolengye la mateya mazwaka bée. <sup>18</sup> Tokuli ba baombo ba masumu,



obuto baombo ba bosembo. <sup>19</sup> Nakpe mowosi  
 nwa bomoto pho ya ewole pho ya boko pha  
 nzoto. Phanza, wabaka ndokolo baombo ba  
 mapho mabe maatome itombele Nwaphongo.  
 Nde bomu unwanwa eye, omiambya mouwosi  
 ndokolo baombo ba mapho maala pho ya  
 bomu bosantu. <sup>20</sup> Pho, waabaka be baombo  
 ba masumu, mapho ma bosembo temaikaka  
 ekyeka. <sup>21</sup> Wamba zwa omu iye? Unwanwa eye,  
 mapho makyelaka be obuto komaokyele so,  
 pho suka ya me eli iwa. <sup>22</sup> Kasi unwanwa eye,  
 tokuli ba baombo ba masumu, obuto baombo ba  
 Nwaphongo, wamokyela mapho ma bosantu.  
 Suka ya me eli bomu pha bobele. <sup>23</sup> Pho  
 iphuti sa isumu eli iwa. Kasi ikabo si ambya  
 Nwaphongo pha, eli bomu pha bobele onte ya  
 Yesu Klisto Nkolo wa banga.

## 7

### *Imana o boombo nwa mibeko*

<sup>1</sup> Baande, be kobungye obokye nawo pho  
 ya bato baebe mibeko obokye, mibeko mili na  
 bokonzi o ikolo sa moto nde imbele sitaa yo ba  
 na bomu? <sup>2</sup> Yango mena, nwanwasi wa bolonga  
 ali o se ya mibeko ma lele we bo naino lele me  
 ali na bomu. Kasi bo lele awe, nwanwasi takuli  
 ba o se ya mibeko ma lele me. <sup>3</sup> Emba bo moloo  
 we ata ba na bomu, bo akye ba na lele mosuu,  
 mena akyesi phemba. Kasi bo lele awe, takuli  
 ba o se ya mibeko. Emba bo akye ba na lele  
 mosuu, mena taiki kyela phemba. <sup>4</sup> Baande na  
 nga, pho ya be eli nde bomu me, wawaka pho

ya mibeko, elele yonoyo na Klisto, pho ya ibutwa bato ba mosuu, owa kundwa onte ya bawee, pho ya obokye tobotele Nwaphongo mbuma. <sup>5</sup> Pho waataka ba banga tobengye bitoma ba bomoto, maphowa mabe maatomisa mibeko makyelaka onte ya banga emba malotomaka o iwa. <sup>6</sup> Kasi unwanwa eye, tolokuli ba baombo ba mibeko, obakyi banga bawe ndokolo baloakya o boloko. Tokokyi ikyelea Nwaphongo na ndengye enyakune o se ya bokonzi pha Bolobo, kasi na ndengye ekasi phe, o se ya bokonzi pha mibeko miakoma be.

### *Mibeko na masumu*

<sup>7</sup> Tomoewole bo? Mibeko mili masumu? Phe! Kasi naebi masumu nde pho ya mibeko. Yango mena sikokyi ieba imengyela bo mibeko temiwoko obokye: «We samengyela». <sup>8</sup> Kasi waateyaka mibeko obokye: Kyeka masumu, masumu mazwa nzela oka nga, mamba ntoma imengyela mbolo ndengye na ndengye. Bo mibeko temili, masumu temali na bokusi. <sup>9</sup> Kalakala wataka ba nga saeba mibeko, nabaka na bomoo. Kasi wa sosolo nga mibeko, masumu mabandi ibutwa na bokusi, <sup>10</sup> emba nga nali mowe. Nwaphongo ambya mibeko pho obokye miphe bato bomoo. Kasi nga mibeko mimbomi. <sup>11</sup> Waoka nga mibeko, masumu mazwe nzela oka nga, ndondo ya nga enkose pho nakyele masumu, yango mena masumu mambomi. <sup>12</sup> Yango mena, mibeko ma Mose mauta na Nwaphongo, mitindo ma mango mili misantu, mibeko me mili ma bosembo na mailaa. <sup>13</sup> Emba yango kyelukye iwo obokye ekpele me elaa ya mboma?

Phe, teli bomoo. Kasi eli nde masumu maamboma. Masumu me makpa ekpele elaa, maamba mboma na yango. Eli pho baefbe obokye masumu mali phele masumu. Emba pho ya mibeko, masumu mawene na bofe koleka.

*Moto ali moombo wa masumu*

<sup>14</sup> Toebe obokye mibeko miute na Nwaphongo, kasi inga nali nde moto. Nabuto moombo nwa masumu. <sup>15</sup> Ikyikyele nga, siisoolo. Pho sikyele ikyi zingye nga ikyela, kasi nakyele nde iteiizingye nga. <sup>16</sup> Bo siizingye ikyikyele nga, mena naanole obokye mibeko mili milaa. <sup>17</sup> Yango mena, bofe bokyele nga, teli nga ookobokyele, kasi eli nde masumu maali onte ya nga maabokyele. <sup>18</sup> Pho na ebe obokye ekpele elaa teli onte ya nga, nawo onte ya nga lokola moto. Nazingye ikyela bolaa kasi siikokye ibokyele. <sup>19</sup> Yango mena, sikyele lowo lolaa lozingye nga ikyela. Kasi nakyele nde lowo lofe loote loozingye nga ikyela. <sup>20</sup> Bo nakyele looteloizingye nga ikyela, mena kyelukye iwoo obokye teli nga moto ookokyele bomoo, kasi eli nde masumu maali onte ya nga. <sup>21</sup> Emba nga nawene bofo: Bo nazingye ikyela bolaa, nawene obokye nakule kyele nde bofe. <sup>22</sup> Kyelukye iwoo obokye o ndondo ya nga nasepele na mibeko ma Nwaphongo. <sup>23</sup> Kasi nawene obokye o ndondo ya nga, wali mobeko mosuu munwane na mibeko ma Nwaphongo. Mobeko me onte ya nga mumbuya moombo nwa masumu. <sup>24</sup> Moto wa ngongoo boli nga! Owa mumanya o boombo pha nzoto ikyitome

o iwaa iye nza? <sup>25</sup> Nwaphongo akumisame na nzela ya Yesu Klisto Nkolo wa banga! Emba inga mampenza na maumanya ma nga natosa mibeko ma Nwaphongo. Kasi nzoto ya nga ya bomoto kyizingye obokye nabengye masumu.

## 8

### *Bomoo boute na Bolobo pha Nwaphongo*

<sup>1</sup> Emba inwanwa eye, Nwaphongo etaingya bato baangana na Yesu Klisto. <sup>2</sup> Pho mobeko nwa Bolobo moolophe bomoo pha phele na nzela ya Yesu Klisto moli mibanga, tolokuli ba baombo ba mobeko nwa masumu na nwa iwaa. <sup>3</sup> Mibeko na Mose temaikaka koka ilophe bomoo pho banga bato toli na boko. Toloikaka koka itosa mibeko kasi lootelaikaka koka mibeko ikyela, Nwaphongo alokyela. Pho ya ilokyela, atoma Nwana we o mokyisi, abuto moto, aulanaka na banga bato ba masumu pho ya imanya masumu ma banga. Yango mena, Nwaphongo amba ingya Nwana we o elele ya banga pho taazingye masumu. <sup>4</sup> Nwaphongo akyela babona pho tozwe nzela ya ikyelela mibeko me, banga baatambule o nzela ya Bolobo kasi bate batambule o nzela ya nzoto. <sup>5</sup> Bato baabikye o nzela ya bomoto, baumunya nkolo iso nde maphoo masepelisa nzoto. Kasi bato baabikye o nzela ya Bolobo, bee baumunya nkolo iso nde ikyela maphoo maasepelisa Bolobo. <sup>6</sup> Bo toumunya nkolo iso nde maphoo maasepelisa nzoto, mena eli nzela ya iwaa. Kasi botoumunya

nkolo iso nde maphoo maasepelisa Bolobo, tomozwa bomoo pha phele na bose. <sup>7</sup> Bato baaumunya nkolo iso nde maphoo maasepelisa nzoto ya be, bali banguna ba Nwaphongo. Tebaabengye na mibeko ma Nwaphongo, tewali nzela obokye baamotosa. <sup>8</sup> Bato babikye o nzela ekyesepelisa nzoto, te bakokyi isepelisa Nwaphongo. <sup>9</sup> Kasi be, toobikye o nzela ya maphoo maasepelisa nzoto. Kasi bee kobikye o nzela eyaka Bolobo pha Nwaphongo pho Bolobo me boli onte ya be. Bo moto tali na Bolobo pha Yesu Klisto onte ye, tali moto wa Yesu Klisto. <sup>10</sup> Bo Klisto ali onte ya be, na bo nzoto ya bee isengyesi iwa pho wakyela masumu, kasi Bolobo phe boephe bomoo, pho Nwaphongo aebuya bato ba bosomebo o miyo me. <sup>11</sup> Kasi bo Bolobo pha Nwaphongo owaakola Yesu Klisto o iwa ali phele o nte ya bee, emba nde ona Nwaphongo me amoakola nzoto ya bee o iwaa me na nzela ya mwiya nwa Bolobo phe boli onte ya be. <sup>12</sup> Pho oli wango babona bande na nga, esengyesi obokye tobikye bokozingye Bolobo kasi bokozingye nzoto ya banga phe. <sup>13</sup> Bo obengyi nzela ya maphoo maasepelisa nzoto ya bee wa mowaa. Kasi boephe Bolobo nzela na mwiya nwe, wamole bobele maphoo mabe makyele be, emba wamoba na bomoo. <sup>14</sup> Bato baso baakambame na Bolobo pha Nwaphongo bali bana ba Nwaphongo. <sup>15</sup> Pho Bolobo phaephe Nwaphongo teboebuya baombo, naa bokule ephe ibale. Kasi eli nde Bolobo Bosantu boebuya bana ba Nwaphongo,

boolotome ibanga Nwaphongo obokye «Aba, Tata!» <sup>16</sup> Bolobɔ me boloteya o mandondo ma banga obokye toli bana ba Nwaphongo. <sup>17</sup> Pho toli bana be, emba tomozwa mbolo iso indaa ikyi bombe yo pho ya banga. Tomoizwa molongo na Yesu Klisto pho banga ne tonyokomo elele yonoyo. Emba na banga me tomozwa nkyemo elele yonoyo ne.

### *Nkyemo ikyiloziya*

<sup>18</sup> Naebe obokye minyoko miiwene banga lolo eye mili ndokolo nwana ekpele mokyiky wa phaa. Temiikiyi bubanaa na nwana bokyi bobo na nkyemo ya loteya Nwaphongo. <sup>19</sup> Bikpele biso biakyela Nwaphongo biziya na phowa. Bizingye na boikye iwene mokolo nwa moweninya Nwaphongo bana bee nkyemo ya be. <sup>20</sup> Pho bikpele biso biakyela yo Nwaphongo te bikuli baa na ntina. Bikpele bye mampenza, te biikaka zinga bomoo. Eli nde Nwaphongo owazinga bomoo. Kasi nkolo iso kalemele, <sup>21</sup> pho mokolo monomo aamokandola na bikpele biso biakyela yo. Bikpele me etebikule baa ndokolo baombo, etebikule pholo, biamozwa nkyemo ndokolo bana ba Nwaphongo, biamozwa bosomi. <sup>22</sup> Toebe obokye nono lolo bikpele biso biakyela Nwaphongo bikyimele. Bili na bolosi ndokolo nwanwasi okosweya. <sup>23</sup> Bolosi me tebookye nde bikpele na bikpele. Na banga bawaa baphe Nwaphongo Bolobɔ phanza na baamokula phe yo nkyemo, na banga tokyimele o mandondo ma banga me. Toziya na phowa iikye obokye Nwaphongo alobuya

bana ɓɛ, kyelukye iwɔ obokye amanya nzoto ya ɓanga o malɔsi. <sup>24</sup> Nwaphongo alobikya kasi naino toloweni maphɔɔ masɔ, tolemele nkɔlɔ isɔ obokye toomawɛ nɛ. Waamowɛnɛ ɓanga na miyo maphɔɔ malemelakyi ɓanga, etelookule malemela phɔ mabuto ma ɓanga. Moto ookolemele ekpele ekye wɛnɛ yo nza? <sup>25</sup> Kasi phɔ naino toloweni ekpele ekyelemele ɓanga, emba tokangye motema, toziya na phowa iikye. <sup>26</sup> Nde ɓomɔɔ, ʼBoloɓɔ nɛ kaya losunga, ɓanga ɓate ɓali na mwiya o nzela ya Nwaphongo. Phɔ toloebe ibɔndɛle na ɓolaa. Kasi Boloɓɔ yo mampenza ka ɓondɛle Nwaphongo o elele ya ɓanga, kanyingonele, koleka ndengye ekokyi iwɔ ɓato. <sup>27</sup> Nwaphongo kaɛbe ili o mandondo ma ɓato. Emba kaɛbe na ikiyumunya ʼBoloɓɔ mɛ, phɔ ʼBoloɓɔ kabɔndɛle o elele ya ɓato, kamobɔndɛle na ndengye ekyezingye yo. <sup>28</sup> Toebe obokye o maphɔɔ masɔ, Nwaphongo kakyele phɔ ya ɓolaa pha ɓato ɓaamozingye, ɓato ɓawaa ɓaabanga yo kokokana na ŋwango nwe. <sup>29</sup> Phɔ ɓato ɓaunva ɔlɔ yo, aunva kana ifabuya ndokolo Nwana wɛ, obokye Nwana wɛ abe bola onte ya ɓana ɓaikye. <sup>30</sup> ʼBaɔlɔ unva ɔlɔ Nwaphongo phanza, amba na ɓabanga. ʼBaabanga yo, ababuya na ɓato ɓa ɓosembo, emba ɓaabuya yo ɓato ɓa ɓosembo, abapɛ na nkyɛmɔ yɛ.

### *Lozingo lonɛnɛ la Nwaphongo*

<sup>31</sup> Emba toombe kula wɔɔ ɓo? ʼBo Nwaphongo ali mbale na ɓanga, owaalotemele nza? <sup>32</sup> Emba Nwaphongo, yo otoika ima Nwana wɛ, amoambya obokye aya waa phɔ ya ɓanga ɓasɔ, emba

takokyi ilophe na banga me iso molongo Nwana we? <sup>33</sup> Owa mophunda bato ba olo Nwaphongo nza? Moto phe. Pho eli Nwaphongo owa babuya bato ba bosembo. <sup>34</sup> Okokyi ibaingya nza? Moto phe. Pho Yesu Klisto ali moto owa waa, aambakula naakundwa, ali o boloo pha Nwaphongo, kambe na bondele pho ya banga. <sup>35</sup> Owaalokabola na lozingo la Yesu Klisto nza? Mampasi, minyoko, bato baalonyokolo, manzala, bobola, ikama, iwaa? <sup>36</sup> Bowakoma bee o buku pha Nwaphongo obokye: «Pho ya we Nwaphongo, imbele siso toli o ikama sa iwaa. O miyo ma bato tobuto ndokolo mampate makye bee boma.» <sup>37</sup> Kasi tolongye minyoko miso mamina na mwiya nwa okolozingye. <sup>38</sup> Pho nali na ianola obokye tewali ekpele eyaa lokabola na lozingo la Yesu Klisto: Ebe iwaa, ebe bomoo, ebe banze, ebe malobo, ebe maphoo maa lol eye, ebe maphoo maamoyaa, ebe iso iili na mwiya, <sup>39</sup> ebe phembo yaa ikolo, ebe na phembo yaa o se, ebe iso yaakyelama, ekpele nono yonyo teekokyi ilokabola na lozingo la Nwaphongo laaweninya yo onte ya Yesu Klisto Nkolo wa banga.

## 9

### *Nwaphongo na bato ba Izalayele baawo yo*

<sup>1</sup> Maphoo mamoo nga mali maa phele, pho nali moto wa Klisto, sikosa. Bolobo kanteya obokye maphoo maawo nga mali maphere, na ndondo ya nga kyeanole bomoo me. <sup>2</sup> Nali na ngongo boikye, imbele siso nali na bolosi o



motema, <sup>3</sup> pho ya Bayuda bato ba ibota sa nga. Bēbi na nga ba ibota sōnōsō. Bo nzela ebakyi, nazingye obokye Nwaphongo anvambe, ambe nakabola na Yesu Klisto pho yabola pha bēbi na nga ba ibota sa nga. <sup>4</sup> Baali bana ba Isalayele, Nwaphongo abawo pho babe bana be, abateya nkyemo ye, akyela na bēe basangola, abaphe mibeko, abateya nzela ya imobondēle, abaikyela mambunu. <sup>5</sup> Baali bankoko ba Abalayama. Yesu Klisto ne wa butwa yo moto, ali wa ibota sa be. Kasi tēbaika moanola. Yo, Klisto ne ali Nwaphongo, ali o ikolo sa maphoo maso. Tomokumbele pho ya bobele. Amē. <sup>6</sup> Teli obokye Nwaphongo taika kyela yaalakaka yo. Alokyla na baakolo bana ba Isalayale. Na wo bo? Na wo ngakye bana bayoko tēbali baakolo bana ba Nwaphongo. <sup>7</sup> Abalayama abaka na bana baikye, kasi bēe baso tēbali baakolo bana bēe bo wa wo Nwaphongo. Kalakala Nwaphongo amba wo na Abalayama yokye: «Baakolo bana ba we bamotokolo oka bana ba Izake.» <sup>8</sup> Kyekukye iwo obokye: Onte ya bana baso ba Abalayama, bēe baso tēbali bana ba Nwaphongo. Nwaphongo kawo yokye baakolo bana bēe eli nde babota yo kokokana na mbunu eya ikyelaka yo Abalayama. <sup>9</sup> Mbunu eya moikyelaka Nwaphongo eli obokye: Waamokoka imbele simekyi nga, namokula yaa, Sala amobota nwana wa lele. <sup>10</sup> Teyaikaka ba nde Sala yo mampenza. Lebeka abaka nwanwasi wa nkoko wa banga Izaka. Aekamaka zaa.\* <sup>11-12</sup> Nwaphongo awoko ne yokye: «Mosi

---

\* **9:10** 9.10 Mapasa

amoleka bola.» Wa wɔ Nwaphongo babona tebaikaka kyela naa maphɔɔ maala naa maphɔɔ maabe, tebataka na botama. Nwaphongo akyela babona phɔ ya iteya obokye kakyele nde bozingye yo. Ka ɔlo moto we onte ya bato, tamooɔ phɔ ya maphɔɔ maala makyele yo. <sup>13</sup> Nde bowakoma bée o buku pha Nwaphongo obokye: «Nwaphongo awɔ yokye nazinga Yakobo, naina Esau.» <sup>14</sup> Emba tomba wɔ bo? Tomowɔ obokye Nwaphongo taakyele maphɔɔ na bosembo? Phe, teeli babona! <sup>15</sup> Amba wɔ na Mose yokye: «Bo nazingyi ikyela moto bolaa, na bokyela. Na bo nazingyi ooka moto ngɔngɔ, naamooka ngɔngɔ.» <sup>16</sup> Emba wa ɔlo Nwaphongo moto, kamooɔ nde phɔ azingyi imokyela bolaa, teeli phɔ moto azingyi, naa phɔ ya etoma ye. <sup>17</sup> Wakomama o buku pha Nwaphongo obokye Nwaphongo awɔko phɔ ya Falo yokye: «Naeteye mokonzi phɔ naweninya oka bato basɔ bokusi pha nga miwe na phɔ nkombo ya nga eokane o mokyisi mobimba.» <sup>18</sup> Yango mena, towene obokye Nwaphongo kakyele bolaa na moto oozingyi yo. Moto oozingyi Nwaphongo obokye abe sa motosa, Nwaphongo kakyele nde obokye abe samotosa bomoo.

### *Yɔɔ na ngɔngɔ ya Nwaphongo*

<sup>19</sup> Naa moto mɔnɔmɔ amowɔ na nga obokye: «Bo ebe babona, phɔ ya'ye Nwaphongo kaoya bato? Bato bakyele ka nde ya baatoma yo mampenza?» <sup>20</sup> Nwebi na nga, iwe moto okowɔ babona, oli nza obokye oikyele Nwaphongo ziko? Mbongo ekokyi iwɔ na owa ekyelela

obokye: «Pho ya'ye onkyesi ndengye eye?»  
<sup>21</sup> Mokyese nwa mambongo ali na bokonzi pha  
 ikyela ekpele ezingyi yo na manyete; nde na  
 manyete me akokyi ikyela mbongo eya mo-  
 tuya na mbongo eteli na motuya. <sup>22</sup> Emba  
 bo Nwaphongo azingakyi iba ya mokyese  
 nwa mambongo, eli lowo la we? Azingaka  
 obokye bato baebe obokye ali na yoo, ali  
 nana mwiya. Emba kakangye motema pho ya  
 bato baokyele yo yoo na baakokyi yo iboma.  
<sup>23</sup> Kasi Nwaphongo azingaka obokye bato baebe  
 obokye ali na nkyemo nzikye, kambe na kabela  
 bato bazingye yo ikyela bolaa nkyemo me.  
 Alobongya phanza obokye tozwe nkyemo me.  
<sup>24</sup> Toli banga baso bato baabanga Nwaphongo  
 pho ya iba bato be. Taika olo nde oka Bayuda  
 na Bayuda, abanga na bato basuu me. <sup>25</sup> Nde  
 bo wawo yo obuku pha Oze yokye: «Bato  
 batebaikaka baa phanza bato banga, nababanga  
 bato banga, na ibota satesaikaka nga zinga,  
 nasibanga ibota saalobo nga zinga. <sup>26</sup> O elele eya  
 woko nga na bee obokye: "Toli bato banga", nde  
 oena elele me, nga Nwaphongo ooli na bomoo,  
 nababanga bana banga.» <sup>27</sup> Ka pho ya bato ba  
 Isalayele, moimosi Isaya awo pho ya be, aimola  
 yokye: «Nabo bato ba Isalayele babaka baikye  
 ndokolo musengye o mokukulu nwa ebale, eba  
 obokye baamobikya Nwaphongo tebali baikye.  
<sup>28</sup> Nkolo Nwaphongo etaa koko, amoyakyela  
 maphoo maso maawo yo o mokyisi.» <sup>29</sup> Nde  
 bowawoko ona Isaya phanza yokye: «Bo Nkolo  
 Nwaphongo okokambe maphoo maso taikaka

manya ndambo ya bana babanga, nde towee ndokolo bato ba Sodomo na Gomola.»

*Yesu ali ndokolo ibanga siibakytinya bato*

<sup>30</sup> Emba tomowo bo? Towoo obokye bato bate bali Bayuda bée tebaikaka luka nzela ya ibutwa bato ba bosembo o miyo ma Nwaphongo. Kasi injwanwa eye babuto bato ba bosembo o miyo ma Nwaphongo pho bamoanosi. <sup>31</sup> Bayuda bée balukaka mibeko pho bamibongya obokye babe bato ba bosembo o miyo ma Nwaphongo, yango mena bakaa o nzela. <sup>32</sup> Bakaa pho ya'ye? Pho baumunyaka obokye bamoba bato bosembo na misala miabaka bée bakyele, kasi te baikaka onola Nwaphongo. Emba bamba zuma o ibanga. <sup>33</sup> Ibanga me eli Yesu Klisto, siiwoo o buku pha Nwaphongo. O buku, Nwaphongo awo yokye: «Okyemela nakyesi ibanga soso o mokyisi nwa Siyona, bato bamobakatana misango. Bato bamokaa pho ya ibanga me. Kasi pho ya moto owa moanola ibanga me etesimophe so.»

## 10

<sup>1</sup> Bande na nga, nazingye na boikye obokye bato banga Bayuda bayee pho Nwaphongo ababikya. Nabondele Nwaphongo na boikye pho ya lowo me. <sup>2</sup> Naebe obokye bazingye ibenga Nwaphongo phele, kasi tebaebe eya kolo nzela. <sup>3</sup> Pho tebaika soso nzela ekyebuya Nwaphongo na yango bato, bato ba bosembo o miyo me. Bazingaka ibenga nde nzela ya bée mampenza. Yango mena bale nzela ekyebuya Nwaphongo na yango bato, bato ba bosembo o

miyo me. <sup>4</sup> Nawo babona pho waaya Yesu Klisto, ayaa unva bokusi pha mibeko ma Mose, akyela babona pho bato baso ba moanole babutwe bato ba bosembo o miyo ma Nwaphongo.

*Moto munsɔ okoanole Yesu Klisto amobika*

<sup>5</sup> Mose akoma pho ya nzela ya ibutwa moto wa bosembo na mibeko, akoma yokye: «Moto ookotosa mibeko miso amozwa bomoo pha phele pho ya mibeko.» <sup>6</sup> Kasi nzela ekyebuya bato ba bosembo o miyo ma Nwaphongo pho bamoanole, nzela me ekyese. O buku pha Nwaphongo bawo pho ya nzela me obokye: «Samiwole obokye: Owa mobaa oikolo nza?» (Kyelukye iwɔ obokye owa mokye banga Klisto aute nza). <sup>7</sup> Samiwole na obokye: «Owa munyolo ose ya manyete onte ya bawe nza?» (Kyelukye iwɔ obokye owamokye banga Klisto obokye atokolo nza). <sup>8</sup> Buku pha Nwaphongo bowo nde obokye: «Iloba sa Nwaphongo sili phenephe na we, tesili itakye na we, iloba me sili o munoko nwa we, sili na o ndondo ya we.» Iloba me eli nde sango siiteya banga bato obokye basengyesi ianola Nwaphongo. <sup>9</sup> Bo kowo na munoko nwawe obokye Yesu ali Nkolo, na bo koanole o ndondo ya we obokye Nwaphongo amoakola o bawe, Nwaphongo amoebikya. <sup>10</sup> Bo toansi Yesu phele tobutwe bato ba bosembo o miyo me. Bo towo na munoko obokye Yesu ali Nkolo, Nwaphongo aalobikya. <sup>11</sup> Nde bo wakoma bee o buku pha Nwaphongo obokye: «Bato baso baamoanole eta baphe so.» <sup>12</sup> Yango mena ebe moyuda,

ebe baate bali Bayuda, bokyese tefoli, Nkolo nde yo monomɔ ali Nkolo wa bato basɔ, kakyele bolaa oka bato basɔ baamobɔndele. <sup>13</sup> Eli bo wakoma bɛɛ o buku pha Nwaphongo obokye: «Bato basɔ baamobɔndele Nkolo bamobika.» <sup>14</sup> Kasi baamobɔndele ndengye'ye bo naino tebamoanosi? Baamoanola ndengye'ye bo naino tebaokyi Simo ye? Bamooka simo ye ndengye'ye bo bato baibaimola yango te bali? <sup>15</sup> Emba baabaimola ndengye'ye fote babatomi? Eli nde bowakoma bɛɛ o buku pha Nwaphongo obokye: «Eye bolaa, na matambe ma bato baaya imola Simo Elaa!» <sup>16</sup> Kasi bato basɔ tebaika anola Simo Elaa me. Moimosi Isaya yo mampenza awɔ yokye: «Nkolo, owaanola Simo eyaimolaka banga nza?» <sup>17</sup> Yango mena, ianola siute na ioka Simo, Simo me eli maloba ma Klisto. <sup>18</sup> Pho oli yango babona, natune motuna monomɔ, na wɔ ngakye: Bato ba Isalayele tebaika aoka Simo Elaa phele? Phe, baeyoka. Nde bo wakoma bɛɛ obuku pha Nwaphongo obokye: Bato bakye miwɔ Iloba sa Nwaphongo o mokyisi mobimba. «Nyesi ya bɛɛ yooka mboka esɔ ebe na o bilele bia itakye.» <sup>19</sup> Emba natune motuna mosuu ngakye: Bato ba Isalayele te baika sosolo na bolaa? Mose awɔ phanza yokye: Nwaphongo yokye: «Namokyela obokye wamookyela ekolo eteli na ngambo zuwa. Na mokyela obokye obe na yɔɔ na ekolo ya bato baatebali na malondo.» <sup>20</sup> Sima me moimosi Isaya awɔ na iwɔ yokye: Nwaphongo kawɔ yokye: «Bato batebaikaka baa bandukye, banzwee. Namiweninye na bato

batebaikaka baa banzongye ekpele.» <sup>21</sup> Kasi pho ya bato ba Isalayele, Nwaphongo kawo na munoko nwe yokye: «Naelolesi bato banga maboko nzanga mobimba obokye baye, kasi bali na nzoto nkusi, tebaikyi anola ikyi wo nga.»

## 11

### *Nwaphongo taikyile bato ba Isalayele*

<sup>1</sup> Emba nakule tuna motuna mosuu: Boli wango baabona, kyelukye iwoko obokye Nwaphongo ale bato bée Isalayele? Phe, na mbala! Pho nga mampenza nali moto wa Isalayele. Nauta o ibota sa Benzame, ne abaka njwana wa Abalayama. <sup>2</sup> Nwaphongo taika le bato bée baolo yo uta wakyela yo mokyisi pho babe bato be. Koebe yaakoma bée o buku pha Nwaphongo pho ya Eliya. Eliya amilelaka na Isalayele o boo pha Nwaphongo. Awoko yokye: <sup>3</sup> «Nkolo, bato baba baboma baimosi ba we, banyangola bilele bietumbele bée mambeka. Naikasi nde nga mampenza okoebengye, balukye imboma me.» <sup>4</sup> Kasi Nwaphongo amobuyisa bo? Awoko ne yokye: «Phe, toli we mampenza. Na bomba pho ya nga bato nkoto sambo bambangye nkolo iso. Bo tebaikyi sambela ekyeko ya Baala.» <sup>5</sup> Pho ya banga lolo eli nde bomoko, wali nde ndambo ya bato baolo Nwaphongo pho ye na ngolu ye onte ya bato ba Isalayele. <sup>6</sup> Pho Nwaphongo abaloko na ngolu ye emba kyelukye iwoko obokye taika baolo pho ya bitoma biikyele be. Bo babona phe, emba ngolu ye nde tekuli ba eyaakolo ngolu.

<sup>7</sup> Kyelukye iwɔ bo? Kyelukye iwɔ obokye bato ba Isalayele tebaika zwa ekyelukye be, ndambo ya bato baoloko Nwaphongo onte ya be, bee baezwa. Kasi pho ya baayoko, babutwaka na nzoto nkusi. <sup>8</sup> Eli nde bo wakoma bee o buku pha Nwaphongo obokye: «Nwaphongo ababuye bibubusi, azibi miyo ma be, aundi na matoo ma be, nɔnɔ lɔlɔ bali nde babona.» <sup>9</sup> Na Davidi awɔ bofo: «Biseleko ba bee biebisa ndokolo izengye siibise nyama. Baaka, Nwaphongo abaphe etumbu ekokyi na be. <sup>10</sup> Miyo ma bee mapholo pho bee sakula wene, bazwakye nkolo iso nde maphoo pho banyibe.» <sup>11</sup> Emba nakule tuna motuna mosuu ngakye: Waazuma Bayuda ibaku, bakaa bobele? Phe, na mbala! Kasi eli nde pho ya obokye bakyela masumu, Nwaphongo abikye bato basuu. Nwaphongo akyela baabona pho Bayuda baokyele bato baayoko zuwa. <sup>12</sup> Waakyela bato ba Isalayele masumu, Nwaphongo akyela bolaa na bato baso ba mokyisi. Pho ya ikaa sa bayuda o boo pha Nwaphongo, bato basuu bazwe bolaa o maboko ma Nwaphongo. Bo Nwaphongo kakyele bato basuu bolaa imbele sitesimotosa Bayuda, bolaa phamba bakyela yo pha moba ndengye'ye waamba mobutwela Bayuda baso?

*Bato baate bali Bayuda bamobika*

<sup>13</sup> Inwanjwa eye na wo na bee bato bali Bayuda. Nali toma wa Nwaphongo owa etomela yo bee bato bate bali Bayuda. Yango mena, nasepele na etoma eyampe yo. <sup>14</sup> Nazingye obokye bato banga Bayuda bawene babona pho



bayokō baokye zuwa, bayee pho Nwaphongo ababikya o nzela ya etoma ya nga. <sup>15</sup> Pho, waale Nwaphongo Bayuda, akyela maḥongye na bato basuu ba mokyisi. Wamoba bo bo akuli ḥaanola? Ya moba ndokolo bawe ḥakundo. <sup>16</sup> Bo moto aphe Nwaphongo mbuma ya ebandele ya inzabi se kyelukye iwō obokye mbuma iso ya inzabi ili ye me. Bo moto amophe munkanga ḥwa ḥwete, emba na bitakyi bili nde ḥēē me. <sup>17</sup> Isalayele eli ndokolo ḥwete ḥwa olive ḥwa tena Nwaphongo ndambo ya bitakyi, o elele ya bitakyi me, aesi ya ebanza, iwe otoli moyuda, ndokolo etakyi ya ḥwete ḥwa olive eya ngonda. Maphōo maala maabaka Bayuda ḥazwe, uḥwanḥwa eye ḥēē komazwe me, ndokolo bitakyi biizwe bokusi uta na ḥwete. <sup>18</sup> Yango mena satiyola bali ndokolo bitakyi ḥatenya. Komitate pho ya'ye? Oli nde bitakyi phaa, bokusi pha bitakyi boute nde na nkanga, bokusi pha nkanga teboutte na bitakyi. <sup>19</sup> Naa monōno onte ya ḥēē amowō yokye: «Ḥwaphongo amanya bitakyi biyokō pho ambanza o elele me.» <sup>20</sup> Eli phele, Nwaphongo abimanya pho teḥaika moanola. Ka pho ya we, aephe elele pho komoanole. Sa ḥaa na lolendo, kasi ḥaa nde na ilota Nwaphongo. <sup>21</sup> Pho, bo Nwaphongo ale Bayuda ḥaabaka ndokolo bitakyi bia phele, koununya obokye etaewiinya me bo tomoasi, iwe o wa banza yo boḥanze wawana. <sup>22</sup> Okyemela boli Nwaphongo molaa naa okophe yo bitumbu me. Kaphe etumbu bato ḥaaka inzela ye, kasi oka ya we ali molaa bo oli oikyela maphōo mamosepelisa. Bo phe

amoemanya me. <sup>23</sup> Bayuda babana, bote baikasi o iba saanola sa be, Nwaphongo ababuya o bilele ba be, pho ali na bokonzi pha ibabuya. <sup>24</sup> Bo toli Bayuda, oli ndokolo bitakyi ba nwete nwa ngonda biteni be, bakye bibanza o nwete moli o ingambi. Bo Nwaphongo akokyi ikyela lowo lokusi babona, embi ba iye obokye abuya Bayuda o elele eya bamanyaka yo, bee baali ndokolo bakolo bitakyi.

*Bayuda bamobongola mandondo*

<sup>25</sup> Bebi na nga, nazingye obokye bee o soso sekyele eye, pho bee sabaa na lolendo. Eli obokye ndambo ya bato ba Isalaye tebazinnye ianola Nwaphongo, yango mena, kasi bamo bongwana. Esengyesi obokye bato baso bate bali Bayuda bawo Nwaphongo baanole, emba bato ba Isalaye bamba bongwana. <sup>26</sup> Emba Nwaphongo amobikya bato baso ba Isalaye bo wa koma bee o buku pha Nwaphongo obokye: «Moto owa moya kandola bato amouta o Siyona. Amumanya masumu ma bato baso baali bana ba Yakobo. <sup>27</sup> Nwaphongo kawo yokye: Eye eli sangola eya mokyela nga na be, wa mumanya nga masumu ma be.» <sup>28</sup> Bayuda bale Simo Elaa, emba babuto banguna ba Nwaphongo. Eli babona pho bee bate bali Bayuda onyolo omo. Kasi mbala eyoko Nwaphongo abawo pho babe bato be, kambe na bazinga pho alakyelaka bankoko ba bee babona. <sup>29</sup> Bo Nwaphongo abangyi moto ambi na mophe mbolo, wa ikale nde babona, pho Nwaphongo taabongole maumunya me. <sup>30</sup> Bee baate bali

Bayuda, kalakala toika tosa Nwaphongo. Kasi unwanwa eye Nwaphongo aeyokyesi ngongɔ phɔ Bayuda tebaikyi motosa. <sup>31</sup> Phɔ ya bɛɛ, ya mobaa nde bomɔ mɛ. Unwanwa eye tebamotosa emba Nwaphongo kakyele nde bolaa oka bɛ. Kasi eli babona phɔ ya obokye na bɛɛ mɛ babongole ntema na obokye Nwaphongo abaokyele ngongɔ. <sup>32</sup> Emba Nwaphongo alɛ bato basɔ obokye balɛ imotosa. Akyela babona phɔ aokyele bato basɔ ngongɔ.

*Ngambo ya Nwaphongo elekyi bonɛnɛ*

<sup>33</sup> Phɛɛ ndondo elaa ya Nwaphongo elekyi! Ali na zebi, kaɛbɛ maphɔɔ masɔ! Ikyiumunya yo o ndondo yɛ moto takokyi iilimbola! Moto takokyi isɔsɔlɔ nzela yɛ! <sup>34</sup> Nde bo wakoma bɛɛ o buku pha Nwaphongo obokye: «Okoebe maumunya ma Nkolo Nwaphongo nza? Ookokyi imophe toli nza? <sup>35</sup> Wali moto owa mokabela ekpele phɔ ya obokye Nwaphongo ali na mbongɔ yɛ?» <sup>36</sup> Eli phɛɛ, tewali moto, phɔ eli nde yo moto owa kyela bikpele bisɔ, yo moto okobifanza, mbolo isɔ ili omɔ phɔ yɛ. Ebongyi tomokumole nkɔlɔ isɔ. Amɛ!

## 12

*Mobesi nwa moto wa etoma wa Nwaphongo*

<sup>1</sup> Phɔ eli babona bande na nga, na ebɔndi, phɔ Nwaphongo alookyesi ngongɔ iikye. Ambya nzoto ya bɛɛ isɔ oka yɛ, phɔ obe na bomɔɔ, omambya ndokolo nyama eya boma bɛɛ phɔ ya ikabela Nwaphongo. Ba mouwosi phɔ yɛ, phɔ ya imosepelisa. Mena eli laakolo losambo

lookokyi bée imosembela. <sup>2</sup> Sa benga mobesi nwa bato ba mokyisi. Le obokye Nwaphongo abongole mandondo ma bée, pho obutwe bato ba mobesi moonyakune. Emba wamoeba maphoo mazingye Nwaphongo. Kyelukye iwoo obokye: Maphoo maala, maphoo mamosepelisa, na maphoo malongobana. <sup>3</sup> Pho ya ikabo saphé Nwaphongo na ngolu ye, nawoo na monomoo na monomoo onte ya bée ngakye: Sa mitata, kasi omiebe nde na bolaa ndengye eli bée phele, kyeka ndengye ya ianola sa we bo owaephe Nwaphongo. <sup>4</sup> Nzoto ya moto ili yoooyo kasi ili na binango biikye. Enango yoooyo na yoooyo eli na etoma eekyese. <sup>5</sup> Na pho ya banga wali nde bomoo me. Toli baikye kasi toli nde monomoo onte ya Yesu Klisto. Totongana na moto monomoo nde bo watongana binango ba nzoto o nzoto ya moto. <sup>6</sup> Nwaphongo alophe makabo ma Boloboo makyese, nde bo wazinga yo ilophe mango. Emba, monomoo na monomoo akyelele makabo me. Bo Nwaphongo aephe ikabo sa iimolaka maphoo me, imola bo koebe we obokye Nwaphongo aephe ikabo. <sup>7</sup> Bo Nwaphongo aephe ikabo sa ikyelela bato, obakyelele bookokyi. Bo Nwaphongo aephe ikabo sa iteya bato, obateya nde bomoo. <sup>8</sup> Bo Nwaphongo aephe ikabo sa ilenzaka bato, obalenzakye nde bomoo. Bo Nwaphongo aephe ikabo sa ikabela babola, obakabele nde bomoo na ndondo yoooyo. Bo Nwaphongo aephe ikabo sa ikamba bebi, kyela etoma me na bolaa. Bo Nwaphongo aephe ikabo sa ikyelaka bebi bolaa, obakyelele na nkyisa. <sup>9</sup> Zinga bebi na

ndondo yonoyo, sa bazinga nde na munoko. Iina maphoo maabe. Zinga maphoo maala. <sup>10</sup> Zinga bebi na be baklisto, eba obokye be baso oli bana ba nyango monomo. Tosanaka be na be. <sup>11</sup> Omiambya o etoma, sa ba bato ba bokoo. Omiambya mouwosi o etoma ya Nkolo. <sup>12</sup> Kolemele yalakyela Nwaphongo. Emba baa na nkyisa. Ititala o minyoko, bondele Nwaphongo imbele sisoo. <sup>13</sup> Kaba mbolo ya be oka baanosi ba Nwaphongo baakyelesi. Yamba na bolaa bato baaye oka be. <sup>14</sup> Onga Nwaphongo apamble bato baenyokolo, sa moonga obokye abakyele bofe. <sup>15</sup> Sepela na baasepele, lela na baalele. <sup>16</sup> Ba na booka we na bebi na we. Sa baa na lolendo, kyela etoma eso na bo ebe na ngambo ekyiky. Saumunya obokye oli bato baa zebi. <sup>17</sup> Bo moto monomo aekyesi bofe, sa mobuyisa bofe, kasi we luka nde nzela ya ikyela maphoo maakokyi obokye bato baso baanole obokye iwe kokyele bolaa. <sup>18</sup> Bo wakokyi, emba bo eeli nde pho ya we, luka obokye obee na bose na bato baso. <sup>19</sup> Be bato bazingye nga, sabuyisa bato bofe, kasi le obokye yoo ya Nwaphongo ekyele etoma ya yango, pho bakoma o buku pha Nwaphongo obokye: «Nkolo Nwaphongo yokye: Moambelesi eli nde nga! Lowo lobe loekyesi nwebi, nde nga moto owaamobuyisa bofe.» <sup>20</sup> Kasi iloba sa Nwaphongo siwo na obokye: «Bo monguna nwa we ali na nzala, omophe nwana ekpele wa iza. Bo ali na phowa ya maa, omophe maa mainywa. Bo okyesi babona soo ya moakya amba na bongye mofesi

nwe.» <sup>21</sup> Samilɛɛ obokye bofe boelekye, kasi leka bofe na ikyela bolaa.

## 13

### *Itosa bakonzi ba baloo*

<sup>1</sup> Moto munso atosa bakonzi ba baloo pho bokonzi bosso boute na Nwaphongo; Emba makonzi maalii, eli Nwaphongo moto owamateye. <sup>2</sup> Emba moto ookotemele bakonzi, katemele maphoo molongo nwaabongya Nwaphongo. Bato bakyele babona bamibangyele etumbu. <sup>3</sup> Bato bakyele bolaa tebali na inganga sa bakonzi, kasi nde bato bakyele bofe bamoba na inganga. Bo tozingye ibaa na inganga sa bakonzi, kyela bolaa pho baekumisa. <sup>4</sup> Eli babona pho bali bato ba etoma ya Nwaphongo, bazingye iesunga o ikyela bolaa. Bo okyesi bofe, ba na inganga na bɛɛ pho bokusi phaabaphe Nwaphongo taaboambya boambisa. Bali bato ba etoma ya Nwaphongo pho ya iteya yaaka Nwaphongo na iphe bato bakyele bofe etumbu. <sup>5</sup> Pho eli babona, osengyesi itosa bakonzi. Teli nde pho bamoephe etumbu bo tobatose. Obatosa nde pho koebe o mandondo ma bɛɛ obokye eli nzela elaa. <sup>6</sup> Pho ya ntina me, yango mena, kophute mputi, pho Nwaphongo ateye bato baephutisa obokye etoma me ebe na bolaa. <sup>7</sup> Phuta oka moto na moto isengyesi we iphuta oka ye. Phuta mputi oka baephutisa, phutela mbolo ya we oka bato baiphutisa. Tosa na bolaa bato basengyesi we itosa.

### *Tozinganaky*

<sup>8</sup> Sa baa na mbongo na moto, boteebe nde mbongo ya izingana onte ya b̄e. Moto okozingye bebi atose mibeko ma Nwaphongo miso. <sup>9</sup> Nwaphongo awo na banga yokye: We sakyela baphemba, we saboma bato, we saiba, we samengyela mbolo ya bato. Mibeko mimi na miyoko mili miso onte ya mibeko monomo moowo obokye: Zinga bebi na we bookomizingye we mampenza. <sup>10</sup> Moto ookozingye nwebi ne etaamokyele bofe. Emba bokozingye bebi na we mena otose mibeko miso.

### *Imbele sa iumwa sikokyi*

<sup>11</sup> Kyela bokusi pho oebe imbele sili banga. Ujwanjwa eye eli imbele siisengyesi b̄e iumwa. Imbele sa Nwaphongo sa iya lobikya sikomi phenephe. Takuli baa itakye ndokolo o imbele sa tataka banga ianola Yesu Klisto. <sup>12</sup> Enzombi kyelukye naiunva, bunya bofengye na iye. To le misala ma enzombi. Tokpe binwanele biamokyelela banga waamoo. <sup>13</sup> To be na mofesi molaa ndokolo bato batambule na moo. Banga salanga maleku, banga sakyela bondumba, banga sakyela mapho maa soo ndengye na ndengye, banga saoka maoka na saokyela bebi zuwa. <sup>14</sup> Omilasa na iso ikyilophe Nkolo Yesu Klisto. Sakula milee o maumunya maabe pho ya isepelisa phowa ya nzoto ya b̄e.

## 14

### *Sa sambisa nwebi*

<sup>1</sup> Yamba na bolaa bato bate bali naino na bokusi o nzela ya ianola Nwaphongo. Kasi

saika na bée miko o maphoo ma umunya bée o mandondo ma be. <sup>2</sup> Nakpe ete pho ya ntoma ya izaa. Bana tebaumunya obokye ntoma iyyoko baikatela, bée baze nde iso. Kasi bato bate bali na bokusi o nzela ya ianola Nwaphongo baze nde ndunda. <sup>3</sup> Ookoze ntoma iso, yo satiyola nwebi ootoze ntoma iyyoko. Ebe ootoze ntoma iso, yo sawole ookoze ntoma iso na bobbe pho Nwaphongo, yo amoyamba. <sup>4</sup> Iwe oli nza okowole na bobbe moto wa etoma wa moto? Bo akyesi bobbe naa bo akyesi bolaa, ekyekyi nde mokonzi nwe. Amokyela bolaa pho Nkolo akokyi imobanza pho yo sakaa. <sup>5</sup> Bato bakyi baumunya obokye mokolo muna molekye nkolo iyoko o miyo ma Nwaphongo, kasi bato baayoko bane umunya nde obokye nkolo iso ili nde ndengye yonyo. Moto na moto ambe nde eba na bolaa ikyiumunya yo o ndondo ye. <sup>6</sup> Moto okoumunya obokye mokolo monomo molekye nkolo iyyoko, kaumunya babona pho akumisa Nkolo Yesu. Moto okoze ntoma iso kazingye ne ikumisa Nkolo pho kapho Nwaphongo melesi pho ya ntoma ikyi ze yo. Moto okole izaa ntoma iyoko, kakyele babona pho ya ikumisa Nkolo me, kapho Nwaphongo melesi me pho ya ikyi ze yo. <sup>7</sup> Moto na monomo onte ya banga, tali mokonzi nwa nzoto ye o mokyisi, na moto na monomo eta we boozingyi yo. <sup>8</sup> Waatabaa banga na bomoo, toli na phango pho ya ikyela etoma ya Nkolo. Waawe banga, towe pho ya ikyela etoma me. Emba bo tobee naa na bomoo, naa bo towe, banga basoo toli nde bato ba Nkolo Yesu Klisto, <sup>9</sup> pho Yesu Klisto awaa amba na kundwa o bawe pho



abe Nkolo wa bato, baali na bomoo na wa bato baawa me. <sup>10</sup> Ka we, pho ya'ye kosambisa nwebi na we? Ka we, pho ya'ye kotiyole nwebi na we? Banga baso tomokyende o boo pha Nwaphongo pho alosambisa. <sup>11</sup> Nde bowakoma bee o buku pha Nwaphongo obokye: «Inga, Nkolo ooli na bomoo, nawo phele ngakye: Mabongo maso mamunkusalela, noko iso yamokumola nkyemo ya Nwaphongo.» <sup>12</sup> Emba mena kyelukye iwo obokye monomo na monomo amoimola yakyela yo. Amoloimola o boo pha Nwaphongo na munoko nwe mampenza.

### *Sa baa ibaku pho ya nwebi*

<sup>13</sup> Emba to le isambisa bebi. Kpa nde mokano obokye otobe ibaku pho ya nwebi pho akyele isumu. <sup>14</sup> Pho naangana na Nkolo Yesu, naebe na bolaa obokye tewali ntoma ili na ekyila, kasi bo moto aumunye obokye ntoma iyoko ili na ekyila ya sa iza, pho ye ntoma me ili nde na ekyila phele. <sup>15</sup> Emba bo we koize, wamoweninya nwebi ndondo bolosi, mena totambule ne na lozingo. Yesu Klisto awaa pho ye. Saanola obokye ntoma ikyize we imooto. <sup>16</sup> Bo koununya obokye lowo loli lolaa, kasi bo koebe obokye bato bamoewole na bofe, sakula lokyela pho bee salowole na bofe. <sup>17</sup> Pho bokonzi pha Nwaphongo teli lowo la iza naa la inywa. Kasi eli nde bosembo, bose na nkyisa ikyi ambya Bolobo. <sup>18</sup> Moto okokyele etoma ya Yesu Klisto babona, amosepelisa Nwaphongo, na bato bamotosa me. <sup>19</sup> Pho ooli wango babona, tokyele bokusi pha ikyela maphoo maambya bose onte

ya banga, na maphoo mamosunga bebi o ikola o nzela ya ianola Nwaphongo. <sup>20</sup> Saoto etoma ya Nwaphongo pho ya lowo la iza. Bo eli phele obokye tewali ntoma ya ekyila, kasi bo bebi na we bamokaa pho ya yango, teli bolaa obokye we o izee. <sup>21</sup> Lowo lolaa eli nde sakyela lowo lokokyi itoma bebi ikyela bofe, ebe iza nyama, ebe inywa, na ebe ekpele'ye. <sup>22</sup> Loebe we pho ya maphoo mamana, olobombe o ndondo ya we, loebe nde we na Nwaphongo. Nkyisa eli na moto otoli na ziko na lowo lokyele yo boko loebe yo. <sup>23</sup> Kasi moto ooli na ziko mi ntoma, bo aize, akyesi bofe pho takyele ikyiute o ndondo ye. Pho lowo loso loteloebe moto na bolaa, bo ali na ziko milango, bo alokyesi, mena akyesi isumu.

## 15

### *Kyela bolaa*

<sup>1</sup> Banga bali bakusi o nzela ya Nwaphongo, esengyesi obokye tosungye bali na bokoo. Banga sakyelaka nde maphoo maazingye banga. <sup>2</sup> Kasi le obokye monomo na monomo na banga akyele bokusi pha isunga bebi baayoko, pho na bee babutwe bakusi o nzela ya Nwaphongo, obokye ianola sa bee sikole. <sup>3</sup> Klisto taika yakyela nde maphoo mazingaka yo mampenza. Kasi eli nde bo wakoma bee o buku pha Nwaphongo bofo: «Bitoo biso biaewambaka bee bia ya kaa nde mi nga.» <sup>4</sup> Maphoo maso maakoma bee o buku pha Nwaphongo, bamakoma obokye maloteya, pho toebakye ikanga ntema, tombakye baa na na etungu. Na bomo tomoba na molemo

oka Nwaphongo. <sup>5</sup> Le obokye Nwaphongo okoloteya bookokyi banga ikanga ntema, na okokyele obokye tobe na etungu, akyele obokye b̄ēe obe na booka onte ya b̄ēe, bokozingye Yesu Klisto. <sup>6</sup> Obokye b̄ēe bas̄o okumole Nwaphongo, Ango wa Nkolo ya banga Yesu Klisto, na ndondo ȳon̄oȳo na ná mun̄ok̄o m̄on̄om̄o.

*Kumbelana onte ya b̄ēe*

<sup>7</sup> Yango mena, okumbelenakye onte ya b̄ēe, bo wa ekumbela Yesu Klisto. Kyelaka bom̄o ph̄o bato bakumole Nwaphongo. <sup>8</sup> Naeyimole phēle obokye Klisto abutwaka mosali n̄wa Bayuda ph̄o abateya obokye Nwaphongo taakate b̄ool̄e. Ayakaka ph̄o ya iya kokya mbunu eya ikyelaka Nwaphongo bank̄ok̄o ba b̄e. <sup>9</sup> Ayakaka na obokye bato b̄ate b̄ali Bayuda bakumole Nwaphongo ph̄o ya bolaa bo bakyelele yo. Eli bo wakoma b̄ēe o buku pha Nwaphongo obokye: «Yango mena namoekumola oka bato baate b̄ali Bayuda, namba na etubela meembo.» <sup>10</sup> Buku pha Nwaphongo bokule w̄ōo obokye: «B̄ēe bato b̄ate b̄ali Bayuda, sepela elele ȳon̄oȳo na bato bāol̄o Nwaphongo!» <sup>11</sup> O elele eȳok̄o bakula koma obokye:

«B̄ēe bas̄o b̄ate b̄ali Bayuda, kumola Nkolo, le obokye bato bas̄o bakumole Nwaphongo!»

<sup>12</sup> Moimosi Isaya ne aw̄ok̄o yokye:

«Moto m̄on̄om̄o o ifota sa Davidi amoyaa, amoya angyela bato baate b̄ali Bayuda.

Bato me bamba kyela molemo n̄wa b̄ēe oka ye.»

<sup>13</sup> Le obokye Nwaphongo okophe bato molemo akyele obokye b̄ēe obe na nkyisa nzikye, ombe

baa na ná bose o mandondo ma b̀̀̀̀ na mwiya  
 ̀̀̀̀wá Bolóbo pha Nwaphongo.

*Polo kawo na etoma ye*

<sup>14</sup> Bande na nga, inga naebe obokye b̀̀̀̀ oli bato balaa, kombe na eba maphoo maso maaloteya Nwaphongo. Na bomo, oteyanakye onte ya b̀̀̀̀. <sup>15</sup> Na bo babona, o munkanda mumu naekomesi maphoo maayoko maunva eba b̀̀̀̀, pho b̀̀̀̀ samabunga. Naekomesi me na bolaa na bolaa, pho Nwaphongo na ngongo ye, <sup>16</sup> ambuya moto wa etoma wa Yesu Klisto oka bato baate bali Bayuda. Namiambya mouwosi oka Nwaphongo ndokolo nganga we, pho ya iyimola Simo Elaa ekyeute oka ye Nwaphongo. Naimole Simo me oka bato bate bali Bayuda obokye baanole Nwaphongo, bambe baa ndokolo ikabo silaa si-iphé Nwaphongo nkyisa. Ikabo me, Bolóbo pha Nwaphongo aunva sibongya pho ye. <sup>17</sup> Yango mena, bo waangana nga na Yesu Klisto, namitate na etoma ya Nwaphongo ekyekele nga. <sup>18</sup> Namowole nde maphoo makyela Klisto na nzela ya nga obokye nakambe bato bate bali Bayuda babutwe itosa Nwaphongo. Akyela bomo na nzela ya maphoo mawo nga na makyele nga. <sup>19</sup> Akyela na bilekyesako ndengye na ndengye na nzela ya nga, iso mina yakye-lama na mwiya ̀̀̀̀wá Bolóbo pha Nwaphongo. Nde na mwiya ̀̀̀̀wá Bolóbo pha Nwaphongo, naimola Simo Elaa ya Yesu Klisto o nkyisi iso, tata o Yelusaleme tee nono o nkyisi ya Iliri. <sup>20</sup> Nabe na phowa ya ikyemimola Simo Elaa o

bilele bili naino bato saeba Yesu Klisto. Sika zinga iimola Simo me o elele eyaunva bato ieyoka, pho ye saba ndokolo naesi ya tonga ingambi o elele eyaunva wangya moto mosuu.

<sup>21</sup> Nazingaka obokye ebe bo wakoma bée o buku pha Nwaphongo obokye:

«Bali sataa zwa Simo ye bamowene.

Bali sataa oka Simo ye, bamoeyeba.»

*Polo kalukye na ikyende o Loma*

<sup>22</sup> Yango mena, mbala na mbala waba nga nalukye obokye naye oka bée, sika kokyisama pho bée waunva oka nkombo ya Klisto.

<sup>23</sup> Mambula maikye nde naunva yaekyeka, kasi etoma ya nga yakyela obokye nga saya. Kasi unwanwa eye, naumbo etoma ya nga o nkyisi iye.

<sup>24</sup> Unwanwa eye nalukye na ikyende o mokyisi nwa Espanye. Na bomo, na moya ekyeka wa moyalekana nga omo. Naumunya obokye bo naesi tomokuta zala na bée bana nkolo, sima bée wamba nsunga pho ya imbanga sikyende nga.

<sup>25</sup> Ka inwanwa eye natakyende o Yelusaleme pho ya isunga bato ba Nwaphongo bali omo.

<sup>26</sup> Pho baanosi ba Masedwane na ba Akaye bakanaka itaa baphalanga pho ya isunga bato ba Nwaphongo baakyelela bali o Yelusaleme. <sup>27</sup> Bée mampenza bawenekye obokye basengyesi ikyela bomo. Bayuda basunga bato bate bali Bayuda obokye bazwe bolaa pha Nwaphongo. Na bomo, eli bola obokye bato bate bali Bayuda na bée basungye Bayuda na mbolo ya mokyisi iili na be. <sup>28</sup> Bo naumbo ibaikyela baphalanga baataa bebi, namoyalekana oka bée pho ya ikyende o

Espanye. <sup>29</sup> Nambe naeba obokye wa moya nga oka b̄εε, Klisto amoepambola na boikye pho ya iya sa nga.

<sup>30</sup> Kasi bande na nga, naongye na b̄εε na nkombo ya Nkolo ya banga Yesu Klisto, na pho na lozingo loophe Bolobo pha Nwaphongo: B̄εε angana na nga, obondεle Nwaphongo na bophelelu pho ya nga. <sup>31</sup> Bondεle na obokye bato ba Yuda bate baanole Klisto b̄εε sankyela bofe, na obokye bato ba Nwaphongo bali o Yelusaleme basepele na etoma ekye bakyelele nga. <sup>32</sup> Na bomo, bo Nwaphongo azingi, namoya oka b̄εε na nkyisa iso, obokye nakute yaema onte ya b̄εε. <sup>33</sup> Le obokye Nwaphongo yo okophe bose, abe na b̄εε baso! Ame.

## 16

### *Polo kalongolo*

<sup>1</sup> Naongye na b̄εε pho ya ηwana nyango na banga wa ηwanwasi Foebe, okokyele o ingomba sa Sankeleya. <sup>2</sup> Waamoya yo oka b̄εε, omokumbele na bolaa na nkombo ya Nkolo Yesu, omokumbele bookokumbelakye baaka Nwaphongo. Omosungye na isungyi siso saamoonga yo oka b̄εε. Pho ne asunga bato baikye, ebe na nga mampenza.

<sup>3</sup> Ondongolele Prisile na molo nye Akilasi baakyelele Yesu Klisto ndokolo nga. <sup>4</sup> Balukaka na iya waa pho ya iya mbikya. Nabaphe melesi na boikye, kasi teli nde nga mampenza, na baanosi baso ba mangomba ma bato baate bali Bayuda babaphe melesi. <sup>5</sup> Olongolo na baanosi

baangane o ingambi sa bɛɛ phɔ ya ibondɛɛ Nwaphongo.

Olongolo na nwebi na nga Epainete. Abaka moto owa o boo owanola Klisto o nkyisi ya Azi. <sup>6</sup> Olongolo na Maliya owa kyela etoma iikye phɔ ya bɛɛ. <sup>7</sup> Olongolo na Andolonikusu na Zuniasi, bali banaa mama Bayuda. Bɛɛ babaka na nga elele yɔɔyɔ o bɔɔkɔ; bali batoma baaɛbana na boikye. Bɛɛ baanolaka Yesu Klisto o boo pha nga.

<sup>8</sup> Olongolo nwebi na nga Ampiliyatusu, oli na nga elele yɔɔyɔ o isanga sa Nkolo Yesu. <sup>9</sup> Olongolo Ulibanusu, nɛ kakyelele Klisto ndokolo banga. Olongolo na nwebi na nga owa zinga nga Sitakasi. <sup>10</sup> Olongolo Apelesi, anyɔkɔmɔ phɔ ya Yesu Klisto kasi taika moangana. Olongolo na bato bazale oka Alisitobule. <sup>11</sup> Olongolo na nwana mama owa moyuda Elodioni, na baanosi baazale oka Narsise. <sup>12</sup> Olongolo na bana nyango na banga baa babasi Tilifene, Tilifose, na Pelesisi; bɛɛ basɔ bakyele etoma na boikye phɔ ya Nkolo ya banga. <sup>13</sup> Olongolo Lufusu, moto wa Nwaphongo mpenza molaa. Olongolo na nyango oli phɔ ya nga ndokolo mama owa mbota. <sup>14</sup> Olongolo na Asenkilite, Felegona, Elemesi, Patolobasi, Elemasi, na bɛbi baanosi bayɔkɔ basɔ bali oka bɛ. <sup>15</sup> Olongolo na Filologe, Zuli, Nele na nwana nyango owa nwanwasi, na Olimpasi na bato basɔ ba Nwaphongo bali oka bɛ.

<sup>16</sup> Olongonɛɛ bɛɛ basɔ, oyambane bokokyelakye bato ba Nwaphongo. Mangomba maso ma Klisto maelongosi.

### *Toli eya suka*

<sup>17</sup> Bande na nga, naongye na b̄e obokye: Okyebe na baamotemele mapho maekosi b̄e. B̄e bakyele obokye bato bakabane, bambe naoto ianola sa b̄e. B̄e saba na b̄e elele yonyo. <sup>18</sup> Bato baa ndengye mena tefakyele etoma ya Nkolo ya banga Yesu Klisto, bakyelele nde mabuu ma b̄e. Na yela ya b̄e ya iwō, bakyelekosa bato bate baebe ekpele. <sup>19</sup> Kasi pho ya b̄e, baanosi baso baebe bokotosa b̄e Nwaphongo, eli nde phele, nali na nkyisa nzikye pho ya b̄e. Kasi nazingye obokye b̄e obe na malondo maikye maikyela mapho maalaa, ole mapho maabe. <sup>20</sup> Iikasi ηwana bokyi bōbo, Nwaphongo okophe bōse amoto mwiya ηwa Molemba, aamokyela o se ya makolo ma b̄e.

Le obokye Nkolo ya banga Yesu aepamble!

<sup>21</sup> Timote okokyele na nga etoma elele yonyo aelongosi. Bebi na nga Bayuda, Lusiisu, Zazona, na Sozipatele baelongosi na b̄e.

<sup>22</sup> Eli nga Teletiusi moto okoekomele mapho mawo Polo o mokanda mumu. Naelongosi na nga na nkombo ya Nkolo.

<sup>23</sup> Gayusi ne aelongosi, nazale o ingambi se. Bato ba Nwaphongo baso baa yasambela oka ye na b̄e baelongosi. Elaste okobombe baphalanga ba mokyisi, na nwebi na banga Kwalatusu baelongosi.

[ <sup>24</sup> Le obokye Nkolo ya banga Yesu Klisto aepamble! Ame.]

*Polo kakumole Nwaphongo*



<sup>25</sup> Tokumole Nwaphongo! Yo ali na makokyi ma iephe bokusi na nzela ye. Eli nde bo kowo nga soo soo waimole nga bato Simo Elaa ya Yesu Klisto eya bombaka Nwaphongo o bileko balekana. <sup>26</sup> Unwanwa eye Nwaphongo ateye Simo me eya bombaka yo o phaa. Na bo wakomaka baimosi pho ya Klisto. Yango mena, bato baso baate bali Bayuda baoka Simo me, bo wa woko Nwaphongo yokye azingaka obokye mabota maso maokye Simo me pho bato bamoanole, bambe na motosa.

<sup>27</sup> Eli nde Nwaphongo, yo mampenza ooli na zebi, azwe nkyemo, na nzela ya Yesu Klisto, pho ya bobele na bobele! Ame!

## **Sangola Eenyakune**

### **Lobala: Sangola Eenyakune New Testament**

copyright © 2018 Wycliffe Bible Translators, Inc.

Language: (Lobala)

Contributor: Wycliffe Bible Translators, Inc.

All rights reserved.

2020-11-18

---

PDF generated using Haiola and XeLaTeX on 21 Feb 2024 from source files dated 29 Jan 2022

45dc5a8e-f513-5ba3-aad6-e48bd1d5b563